



ZÄHNTE JOHRGANG

FASNACHT 2007

S Niveau vo de Gspreech im Bundeshuus isch maischtens ender schlicht  
So frogt dr Couchepin d Calmy-Rey: «Was machsch denn Du do fir e Gsicht?»  
Druff maint s Micheline: «Liebe Pascal, myni Antwort lutet soo:  
Wenn y Gsichter mache kennt, hätsch Du scho lang e neys bikool!»

Au uus unsrer Sicht isch s wichtig d EU-Oschtmilliarde z spände  
Unsri Frind dert dien dâ Glotz ganz sicher nutzbringend verwände  
Z Pole goht dâ Stutz in Stroossebau – do simmer uns im Glaare  
So macht s erscht richtig Fraid mit de uns gmuggte Auti ummezfare

Däne Zircher isch nyt hallig – das sin ächti Raiberhorde  
Jetz isch s Läggerlihuus no e Beuti vo de Blochers worde  
Drum sin mir Gsalzene no Ziri, hänn brobiert uns z revanchiere  
Aber dert git s numme Zircher, also nyt zem Importiere

Blueme bliehe zmitts im Winter und es bloost e laue Wind  
Z Basel fyhlt me d Weermi bsunders und me schwitzt ungläubig gschwind  
Duet me in unsrer Stadt au d Folge vo däm «Global Warming» gspyyre?  
Nai, es isch doch nur dr Minu, wo sy Hochzytsfescht duet fyre

Bim Intoniere vo däm Vårs schwillt unsri Bruscht vor luter Stolz  
Mir Basler sin d Elite, gschnitzt uus uuserweeltem Edelholz  
Mir sin dr Hammer, s glingt uns alles, sogar ganz verruggti Sache  
Sälbverständlich diemer uns au no d Äärdbeebe sälber mache  
*Fir die Äärdbeebe het d SP Baselland d Schuld ibernoo*  
*Im Wahlkampf haige si halt gsait, es miess e Rugg dur d Regio goo*  
*Als Draaiort fir dr näggscht James Bond-Film het me Basel-Stadt ermittlet*  
*Ganz noon em Motto: Zwor nit griehrt, derfir e weeneli stargg gschittlet!»*

Anti-WEF-Demo und Vogel Gryff mitnander duregfiehr  
D Polizey het pflichtbewusst alli Vermummte inhaftiert  
Und am Sunntig sin denn zämme mit de Demonstrantehorde  
Au dr Wild Maa und dr Lai no uff Kaution entlosse worde

Dâ haisst Zicki – dasch dr Zacki – d EURO-08-Witzfigure  
Dass me uns in däm Verfahre nid begriesst het, isch z beduure  
Will, im Benamse vo Maskottli sin mir Gsalzne routiniert  
Lari & Fari hämmer byspylswys em Groossroot präsentiert  
Stinggi & Pinggi als Maskottli vo de groosse Schwyzer Bangge  
Glubschi & Grabschi ka d Miss Schwyz-Wahl ihre Groosserfolg verdangge  
Packsi & Hacksi basse guet zue gwisse Fans vom FCB  
Kreti & Pleti kasch im Tennisdorf vo de Swiss Indoors gseh  
Glotzi & Protzi basst zue allne High-Society-Aaläss  
Filzi & Schwalli sin d Gliggsbringer fir dr Swissair-Stroofbrozäss

Im Ami-Land duets mächtig stingge  
Em Bush sy Stärn dâ isch am singge  
Er maint: «Nur epper ka s no richte  
Y muess die Gsalzene verpflichtet!»

Mir hänn d Berootig sofort uffgoo:  
«Liebe George, zem wider aakoo  
Sottisch, ohni Di z geniere,  
No sone munzig Griegli fiehre!»

«Zerscht muesch zem neyi Gegner bueche  
Massevernichtungswaffe sueche  
Die greeschti Gfohr zer Zyt, das waisch,  
Isch s dytsche Döner-Gammelfleisch!

Doch Dytschland gheert niemools vernichtet  
Die fyhle sich Dir stargg verpflichtet  
Will, dangg Dir – das dien si loobe,  
Hasst me d Amis meh als d Schwoobe

Zem Dii als Griegsheld profiliere  
Sottsch eppis anders okkupiere  
Wie fahrsch e Siig villicht no hai?  
Brobiers doch 'mool mit Liechtestall

Mach wyter Klimabolitigg  
Das finde d Amis wirgglig schigg  
Wenn d Eskimo Banane pflanze  
Friere d Pinguin nimm an Ranze

Und Top-Berooter bruucht Dy Land  
Uns hesch nur temporär zer Hand  
Comic-Figure wurde basse  
Zue Dyne tumbe Ami-Masse

Dr Staizyt mensch Fred Feuerstai  
Fyhlt sich bi Dir sofort dehal  
Und sälbscht dr glaini Winnie-Puh  
Waiss meh vo Bolitigg als Du!

Und noo dr Amtszyt – nimm das mit  
Driffsch d Frau Jolie und dr Heer Pitt  
Die dien sich jo vor nyt geniere  
Wurde au Dii no adoptiere!»

Dir gsehnd: Die Wält bruucht unsri Hilf  
D Bolitigg stoht arg im Schilf  
Au fir d Schwyz isch s noni z spoot  
Die Gsalzene in Bundesroot!

Wird au du e Schnitzelbänggler!

Schryyb alfach e E-Mail an [info\\_bsg@bsg-online.ch](mailto:info_bsg@bsg-online.ch)